

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
BROJ: 43 0 K 256840 25 K
Zenica, 16.02.2026.godine

Presuda je pravosnažna
dana 08.04.2026. godine

Sudija
Agić Sabrija, s.r.

U IME FEDERACIJE BOSNE I HERCEGOVINE !

Općinski sud u Zenici, sudija Agić Sabrija, kao pojedinac, uz učešće zapisničara Crnkić Kanite, u krivičnom predmetu protiv optuženog H.Dž., zbog krivičnog djela Teška krađa iz člana 287. stav 1. tačka a) KZ F BiH, po optužnici Kantonalnog tužilaštva ZE-DO kantona Zenica ,broj: T04 0 KT 0058934 24 od 12.02.2025. godine, nakon održanog pretresa za izricanje krivične sankcije, u prisutnosti tužioca Pelidija Mirele i optuženog H.Dž. a, dana 16.02.2026.godine donio je i javno objavio

P R E S U D U

Optuženi H.Dž., sin K. i majke Z. rođene B., rođen ...godine u V., gdje je i nastanjen na adresi ..., V., sad se nalazi na izdržavanju kazne u KPZ Sarajevo, odjeljenje Usikolina, nezaposlen, pismen, bez zanimanja, oženjen, bez imovine, povremeno zarađuje, vojsku nije služio, ne vodi se u vojnoj evidenciji, po narodnosti ..., maternji jezik, državljanin BiH, JMBG:....., višestruko osuđivan,

K R I V J E

Što je, dana 25.01.2023. godine u vremenskom periodu od 11,30 do 13,30 sati, u Z., s ciljem pribavljanja protivpravne imovinske koristi, došao do kuće vlasništvo S.A., koja se nalazi u ulici ..., te uz upotrebe fizičke snage i podesnog predmeta, nasilno otvorio ulazna pvc vrata na kući, ušao u unutrašnjost iste i otuđio: tri štedne kasice sa novcem u iznosu oko 450,00 KM, tri mobitela marke „LG K10“ sa SIM karticom broj: ..., „Nokia“ sa SIM karticom broja: tamno-plave boje i „Samsung NEO5“ sa SIM karticom broja:, tablet marke „Samsung“ sa razbijenim ekranom, jedan crni kofer u kojem su se nalazili autodijelovi za pmv marke „Volvo“ i to: sajla za mjenjač, poklopac za motor, mjerač za ulje i nekoliko tuba sa pastom za poliranje vozila i nekih sitnih dijelova, iako je bio svjestan da se radi o tuđim pokretnim stvarima i da na taj način može oštetiti drugoga, što je i htio, nakon čega se sa otuđenim predmetima udaljio u nepoznatom pravcu,

dakle, tuđu pokretnu stvar oduzeo s ciljem da njenim prisvajanjem pribavi sebi protivpravnu imovinsku korist,

čime je počinio krivično djelo Teška krađa iz člana 287. stav 1. tačka a) KZ F BiH, pa se na osnovu istog člana i propisa i uz primjenu odredbi člana 49. stav 1. KZ FBiH

O S U Đ U J E

na kaznu zatvora u trajanju od 1 (jedne) godine i 3 (tri) mjeseca.

U skladu sa članom 202. stav 4. ZKP-a F BiH optuženi H.Dž. se oslobađa obaveze da Sudu naknadi troškove krivičnog postupka.

U skladu sa čl.212. stav 3. ZKP F BiH optuženi H.Dž. se obavezuje da oštećenju Smajlović Avdijani po osnovu štete isplati iznos od 1.000,00 (hiljadu) KM u roku od 15 (petnaest) dana od dana pravomoćnosti Presude.

Obrazloženje

Kantonalno tužilaštvo Zenica je dana 13.02.2025. godine kod ovog Suda podiglo optužnicu, T04 0 KT 0058934 24 od 12.02.2025. godine, protiv optuženog H.Dž., a koja je potvrđena dana 13.02.2025. godine, zbog krivičnog djela djela Teške krađe iz člana tačka a) KZ F BiH,, bliže opisano u dispozitivu Presude.

Optuženi H.Dž. prilikom izjašnjenja o krivnji, na Zapisnik ovog Suda od 11.12.2025. godine, izjasnio se krivim za krivično djelo koje mu se stavlja na teret Optužnicom. Sud je razmotrio njegovu izjavu o priznanju krivnje i tom prilikom je utvrdio da optuženi H.Dž. u momentu priznanja krivnje nije bolovao ni od kakve psihičke ili duševne bolesti, da nije bio pod uticajem alkohola ili droga te da je bio sposoban za postupak pred Sudom. Također je tom prilikom Sud utvrdio da ga niko nije natjerao da prizna krivnju, da mu niko nije ništa dao ili obećao dati kako bi priznao krivnju, da je razumio da se priznanjem krivnje odriče prava na suđenje, tj. da se neće neposredno izvoditi dokazi koji se tiču postojanja krivičnog djela i njegove krivnje za isto, već da se mogu samo izvoditi dokazi na okolnosti koje utiču na vrstu i visinu kazne, da je upoznat sa posljedicama o priznanju krivnje, tj. da može biti obavezan na naknadu štete Oštećenoj i troškova postupka Sudu, da mu je poznato da može tražiti od Suda da ga Sud oslobodi obaveze za naknadu troškova postupka ako nije u mogućnosti da to učini.

Sud je izvršio uvid u dokaze u spisu na kojima se zasniva Optužnica za ovo krivično djelo i to : Zapisnici o saslušanju svjedoka-oštećene S.A. PU I Zenica, broj: 08-02-08/4-38/23 od 26.01.2023. godine i broj: 08-02-08/4-58/23 od 06.02.2023. godine, Zapisnik o saslušanju svjedoka T.A.PU I Zenica ,broj: 08-02-08/4-47/23 od 31.01.2023. godine, Standardizirani policijski izvještaj PU I Zenica ,broj: F04-12-23-0320 od 25.01.2023. godine, Zapisnik o uviđaju PU I Zenica broj: 08-02-08/4-35/23 od 25.01.2023. godine, Zapisnik o izvršenoj radnji privremenog oduzimanja predmeta i popisu privremeno oduzetih predmeta PU I Zenica, broj: 08-02-08/4-33-1/23 od 06.02.2023. godine, Potvrdu o privremenom oduzimanju predmeta PU I Zenica, broj: 08-02-08/4-33/23 od 06.02.2023. godine na ime H.Dž., Potvrdu o vraćanju privremeno oduzetih predmeta PU I Zenica ,broj: 08-02-08/4-33-1/23 od 06.02.2023. godine, i Izvod iz kaznene evidencije za optuženog H.Dž. PS Visoko od 30.05.2024. godine. Optuženi nije prigovorio sadržaju i zakonitosti dokaza.

Sud je cijeneći sadržaj dokaza i priznanje krivnje optuženog H.Dž. utvrdio nespornim da je počinio radnju teške krađe na način kako je to bliže opisano u dispozitivu Presude i da je na taj način ostvario obilježja krivičnog djela Teške krađe iz člana 287.stav1. tačka a) KZ FBiH.

Dokazi u spisu ukazuju da je kod optuženog H.Dž. u kritično vrijeme postojala krivnja za krivično djelo koje mu se Optužnicom stavlja na teret. Naime, optuženi H.Dž. bio je svjestan i znao da čineći radnju, na način kako je to bliže opisano u dispozitivu Presude, postupa protupravno, a što je i htio sa namjerom da sebi pribavi protupravnu imovinsku korist. Dakle, bio je svjestan svoga djela i htio njegovo izvršenje i postupao je sa direktnim umišljajem, pa ga je stoga Sud i oglasio krivim.

Iz Izvoda iz kaznene evidencije vidljivo je da je optuženi H.Dž. do sada 10 puta osuđivan, a od toga 8 puta za krivična djela imovinskog karaktera.

Prilikom odlučivanja o vrsti i visini krivične sankcije Sud je imao u vidu da je za krivično Teške krađe iz člana 287.stav1. tačka a) KZ FBiH propisana kazna zatvora od šest mjeseci do pet godina , težinu krivičnog djela, stepen i oblik krivnje optuženog H.Dž., s tim da je na strani Optuženog Sud cijenio kao olakšavajuće okolnosti da je priznao izvršenje krivičnog djela, da se kaje, da je dao obećanje da se to više neće ponoviti i da je u vrijeme izvršenja predmetnog krivičnog djela bio u teškoj materijalnoj situaciji, a što je sigurno doprinijelo da počini predmetno krivično djelo, a Sud je cjenio kao otežavajuće okolnosti njegovu raniju osuđivanost i da se nalazi u višestrukome specijalnom povratu u izvršenju krivičnih djela imovinskog karaktera , te Sud očekuje da će se sa izrečenom osudom ostvariti opća i individualna svrha izricanja krivičnih sankcija.

Odluka o troškovima postupka, koji se odnose na paušal u iznosu od 100,00 KM, temelji se na odredbama člana 202. stav 4. ZKP FBiH, a Sud je optuženog H.Dž. oslobodio obaveze da iste nadoknadi jer se radi o licu bez imovine i redovnih prihoda.

Odluka o imovinskopravnom zahtjevu oštećene S.A. temelji se na odredbama čl.212. stav 3. ZKP F BiH, a Sud je optuženog H.Dž. obavezao da oštećenoj Smajlović Avdijani po osnovu štete isplati iznos od 1.000,00 (hiljadu) KM jer vrsta i visina štete u toku postupka nije bila sporna.

Shodno iznesenom valjalo je Sudu odlučiti kao u dispozitivu Presude.

Zapisničar
Crnkić Kanita,s.r.

Sudija
Agić Sabrija,s.r.

PRAVNA POUKA:

Protiv ove Presude može se izjaviti žalba
Kantonalnom sudu u Zenici u roku od 15 dana
od dana prijema pismenog otpravka Presude.
Stranke mogu izjaviti žalbu iz svih zakonskih
razloga, a Oštećena zbog odluke o troškovim postupka i
odluke o imovinskopравnom zahtjevu. Žalba se podnosi putem ovog Suda u tri primjerka.

-ZKP FBiH -Zakon o krivičnom postupku Federacije BiH (Službene novine Federacije BiH, broj 35/ 03, 47/03, 56/03, 74/04, 28/05, 55/06, 53/07, 09/09, 12/10 i 08/13);
-KZ FBiH-Krivični zakon Federacije BiH (Službene novine Federacije BiH, broj 36/03, 37/03, 21/04, 69/04 i 18/05).